

Broj: 03-02-462/2017
Sarajevo, 03.10.2019. godine

**PARLAMENT FEDERACIJE
BOSNE I HERCEGOVINE**

- Dom naroda -
gosp. Tomislav Martinović, predsjedavajući ✓

VRLO HITNO

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

Primijeno:


Org. jed.	Broj	Priloga	Vrijednost
	02-02-	829/17	X10

PREDMET: Izjašnjenje Vlade Federacije Bosne i Hercegovine

Poštovani,

U skladu sa članom IV.B.3.7.c) (III) Ustava Federacije BiH, a u vezi sa odredbom člana 183. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09), u prilogu Vam dostavljam **Izjašnjenje Vlade Federacije Bosne i Hercegovine o amandmanima na Prijedlog zakona o obrtu i srodnim djelatnostima u Federaciji Bosne i Hercegovine, koje je podnio Aner Žuljević, delegat u Domu naroda Parlamenta Federacije Bosne i Hercegovine, a koje je Vlada Federacije Bosne i Hercegovine utvrdila na 193. sjednici, održanoj 03.10.2019. godine.**

S poštovanjem,



PREMIJER

Fadil Novalić

Prilog: kao u tekstu

**Cc: Federalno ministarstvo razvoja, poduzetništva i obrta
gosp. Amir Zukić, ministar**

Na osnovu člana 73. Poslovnika o radu Vlade Federacije Bosne i Hercegovine - Prečišćeni tekst („Službene novine Federacije BiH“, br. 6/10, 37/10 i 62/10) a u vezi sa odredbom člana 183. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09), nakon razmatranja amandmana na Prijedlog zakona o obrtu i srodnim djelatnostima u Federaciji Bosne i Hercegovine, koje je podnio Aner Žuljević, delegat u Domu naroda Parlamenta Federacije Bosne i Hercegovine, Vlada Federacije Bosne i Hercegovine je, na 193. sjednici održanoj 03.10.2019. godine, utvrdila sljedeće:

IZJAŠNENJE
o amandmanima na Prijedlog zakona o obrtu i srodnim djelatnostima u Federaciji Bosne i Hercegovine, koje je podnio Aner Žuljević, delegat u Domu naroda Parlamenta Federacije Bosne i Hercegovine

AMANDMAN I

Dodaje se član 18. koji glasi:

Član 18.
(Obrtnica)

- (1) Za obavljanje obrta, obrtnik mora imati obrtnicu, koja je, u smislu ovog zakona, odobrenje za rad.
- (2) Po upisu u Obrtni registar obrtnička komora kantona (u daljem tekstu: kantonalna komora) na čijem teritoriju se nalazi sjedište obrta obrtniku izdaje obrtnicu.
- (3) Obrtnica se izdaje u dvije veličine od kojih je veću obrtnik dužan izložiti u sjedištu obrta, na vidnom mjestu.
- (4) Izradu i distribuciju obrtnica kantonalnim komorama, u skladu sa stavom (6) ovog člana, vrši Komora.
- (5) Cijenu obrtnice određuje Skupština Komore i ne može iznositi više od 3 % prosječne plate u Federaciji Bosne i Hercegovine obračunate u prethodnoj kalendarskoj godini.
- (6) Sadržaj i oblik obrtnice pravilnikom propisuje Ministar.

IZJAŠNENJE
Amandman se ne prihvata
OBRAZLOŽENJE

Amandman I se odnosi na ponovno propisivanje obrtnice koja je u Prijedlogu Zakona izostavljena zbog razloga koji je jedan od cilja novog zakona, a to je uklanjanje administrativnih prepreka i njenim vraćanjem došli bi opet u situaciju da imamo članove koje u praksi ne možemo provesti jer je njihova realizacija uslovljena i propisima iz drugih oblasti koje isto onemogućuju. Isto tako, izdavanje obrtnice bi bilo dodatno finansijsko opterećenje kako za obrtnike tako i za ministarstvo.

AMANDMAN II

U članu 19. prijedloga zakona dodaje se novi stav 2. a stav 2. postaje stav 3.

(2) Obrtnici koji obavljaju obrt u skladu sa članom 40. ovog zakona, mogu ponuditi i proizvode drugih tradicionalnih proizvođača (suvenire, nakit i antikvitete) koji se uklapaju u cjelovitu ponudu, a količina takvih proizvoda ne može premašiti količinu proizvoda iz oblasti osnovne djelatnosti, koja je propisana šiframa djelatnosti u rješenju kojim je odobreno obavljanje djelatnosti.

IZJAŠNENJE

Amandman se ne prihvata

OBRAZLOŽENJE

Amandman II je neprihvatljiv jer bi se njegovim usvajanjem kršili drugi zakonski propisi. Amandman II u prijedlogu je neprihvatljiv iz razloga što obrtnik osim obavljanja osnovne djelatnosti bi po amandmanu mogao obavljati i trgovinu drugih proizvoda na malo što je iz oblasti trgovine i što je neprihvatljivo.

AMANDMAN III

U članu 23. stav 1. mijenja se i glasi

(1) Članovi zajedničkog kućanstva mogu u obavljanju obrta pomagati obrtniku, ako je obrtnik na bolovanju, službenom putovanju ili godišnjem odmoru.

IZJAŠNENJE

Amandman se ne prihvata

OBRAZLOŽENJE

Amandman III je neprihvatljiv jer bi se njegovim usvajanjem kršili drugi zakonski propisi. Amandman III predviđa da umjesto riječi -pomaganje- koja se nalazi u važećem zakonu damo mogućnost članovima porodičnog domaćinstva da bez ograničenja rade, a bez zasnivanja radnog odnosa što stvara mogućnost zloupotrebe što također nije u skladu sa Zakonom o radu.

AMANDMAN IV

Iza člana 36. prijedloga zakona o obrtu i srodnim djelatnostima dodati član 37. i član 38. koji bi glasili:

Član 37.

(Prijenos obrtnice u slučaju kupoprodaje obrta)

(1) Obrtnica se može prenijeti na drugo lice u slučaju kupoprodaje obrta.

(2) Kupac obrta može nastaviti vođenje obrta sam, ako ispunjava uvjete iz člana 9. i člana 10. stav (1) ovog Zakona ili putem zaposlenika koji mora biti u radnom odnosu kod kupca obrta i ispunjavati uvjete iz člana 5. i člana 6. stav ovog Zakona.

Član 38.

(Uvjeti za prijenos obrtnice u slučaju kupoprodaje obrta)

(1) Kupac obrta iz člana 37. stav (2) ovog Zakona dužan je podnijeti nadležnom organu zahtjev za prijenos obrtnice u roku od 30 dana od dana zaključivanja kupoprodajnog ugovora.

(2) Uz zahtjev iz stava (1) ovog člana mora se priložiti:

- ovjeren kupoprodajni ugovor;
- dokazi o ispunjavanju uvjeta iz člana 5. i člana 6. ovog Zakona
- ime i prezime zaposlenika i dokaz da ispunjava uvjete iz člana 5. i člana 6. stav ovog Zakona, ako kupac nastavlja voditi obrt putem zaposlenika;
- ovjerenu izjavu kupca da preuzima sve obaveze nastale u toku obavljanja obrta do trenutka njegove kupovine.

(3) Nadležni organ iz stava (1) ovog člana donosi rješenje te upisuje prijenos obrtnice i nastavak vođenja obrta putem zaposlenika u Obrtni registar.

IZJAŠNENJE

Amandman se ne prihvata

OBRAZLOŽENJE

Amandman IV odnosi se na prijedlog prenosa obrtnice u slučaju kupoprodaje obrta i isti je neprihvatljiv zbog toga što je neprimjenjiv jer je u suprotnosti sa drugim propisima pa je iz tog razloga izbačen, a sve iz razloga što se na obrtnici nalazi ID broj koji se vezuje za osobu vlasnika obrta a ne za obrt pa ne postoji mogućnost ni njenog prenosa na drugu osobu u slučaju promjene vlasništva obrta, a materija za isto je u nadležnosti Ministarstva finansija.

AMANDMAN V

U članu 46. stav 4 mijenja se i glasi:

(4) Fizička lica iz stava (1) ovog člana obavezna su plaćati članarinu, čiju visinu utvrđuje Skupština Komore, u mjesečnom iznosu ne višem od 1 % iznosa prosječne mjesečne plate u Federaciji BiH obračunate za prethodnu kalendarsku godinu.

IZJAŠNENJE

Amandman se ne prihvata

OBRAZLOŽENJE

Amandman V odnosi se na povećanje članarine u odnosu na predloženo u Zakonu i isti je neprihvatljiv, jer je upravo na prijedlog poslanika u Predstavničkom domu, kao i delegata u Domu naroda Parlamenta Federacije BiH izvršena korekcija članarine koja se nalazi u sadašnjem prijedlogu kada je ovaj zakon prolazio parlamentarnu proceduru u formi nacрта. Drugi razlog, zbog koga je ovaj amandman neprihvatljiv je što je vrijednost članarine usklađena sa članarinom koja je utvrđena u Republici Srpskoj i Distriktu Brčko, što je u sinhronizaciji pravnih akata bila naša obaveza.

AMANDMAN VI

U članu 45. stav 1 tačka c i tačka d mijenja se i glasi:

- c. Obrtnička komora kantona
- d. Obrtnička komora Federacije Bosne i Hercegovine

IZJAŠNJENJE **Amandman se ne prihvata** **OBRAZLOŽENJE**

Amandman VI je također naeosnovan zato što je puni naziv komora već propisan u članu 42. i 43. gdje se pojam naziva pojedinih komora u zakonu spominje prvi put i gdje je utvrđen skraćeni naziv što je u skladu sa pravnom nomenklaturom, tako da je ovaj prijedlog u amandmanu neprihvatljiv.

AMANDMAN VII

U članu 65. stav 1. mijenja se i glasi:

Skupština Komore donosi Statut kojim se utvrđuje organizacija i način djelovanja Komore.

IZJAŠNJENJE **Amandman se ne prihvata** **OBRAZLOŽENJE**

Amandman VII je neprihvatljiv iz razloga što je Vlada Federacije BiH formirala Obrtničku komoru Federacije BiH i samim tim postoji obaveza komore da na njen statut da saglasnost Vlada Federacije BiH, a amandmanom se traži da Statut potvrdi samo Skupština komore što je neprihvatljivo budući da je u Zakonu propisano šta Statut komore treba da sadrži. Zbog toga je predviđeno da Vlada Federacije BiH da saglasnost na Statut, nakon što se utvrdi da Statut sadrži sve potrebne elemente koji su propisani Zakonom o obrtu i srodnim djelatnostima.

Svi predloženi amandmani su neprihvatljivi jer su u suprotnosti sa ciljem zbog koga se krenulo u izradu novog zakona, a to je prije svega uklanjanje administrativnih prepreka kao i odredbi Zakona koje se nisu primjenivale.

V. broj: 1106 /2019
03.10.2019. godine
Sarajevo



PREMIJER

Fadil Novalić
Fadil Novalić